

AR KOLOSENSE

Ar he'mi bi 'yot'a ar Pablo bi mēmpa ya me Kolosa

Ar nzengwa

1 Nuga dar Pablo, ár mpotegi ar tsi Hmu Hesukristo ngetho njap'u xi ne Jö. Di zengwa'ihe, nuga ne ar ku Timoteo.

²Di peñ'ahe nunar he'minu nu'ahü gar gamfihu me Kolosa, gi teñhu ar tsi Hmu Hesukristo. Jö ma Dadahu ne ma tsi Hmuhi Hesukristo da 'ra'ahü n'ar hogam'ui ne da hwëk'ahü yá ñho.

Ar Pablo apa Jö da umba ya gamfi n'ar hoga mfödi di 'ñe mhets'i

³Hyax'mü di afe da max'ahü Jö ár Dada ma tsi Hmuhi Hesukristo, ne hindi tsayahe di umfe njamödi.

⁴Xta ohe tengu ri jamfihu gi pe'spabihu ar tsi Hmu Hesukristo, ne ar mhöte gi pe'sfu n'a ngu n'a ya gamfi,

⁵ngetho gi ndo'mhu ma gi hñöñhu nö'ö xi t'ek'ahünu mhets'i, habu xpa hok'ahü Jö, gathu nu'ahü xka 'yohu nongar hoga mhö majöni.

⁶Nunar hoga mhö xka 'yohu xi nunga gathu ár nxidi ar ximhai, ñhehwi n'ar 'baiza te ne unga ar sofo. Xka njahup'u nú'mü mi zo ri

guhu ne ga pötwabihu nö'ö majöni ár hoga nhwëki Jö,

⁷ngu xi ut'ahü ma hmöka kuhü ar Epafra, ma mi'begohe. Gehnu n'ár hoga 'bego ar tsi Hmu Hesukristo 'bui da max'ahü.

⁸Xi xikagihe n'ehe, nuna ri döta mhöte gi pe'su xi 'ra'ahü ár Hñö Jö.

⁹Nu nda jwadi da ohe, hindi tsayahe di afe Jö da yot'a ri mfenihu gi pöhu te ne'ö, ne da 'ra'ahü ar hoga mfeni ne ar hoga mfödi di 'ñe mhets'i.

¹⁰Di a'ahü gi 'buhu ngu di 'ñepi da m'u n'ár bötsi Jö, ne xa da numañho'ihü. Da nheki ri hogam'uihu, ne hyax'mü 'yo gi pöhu togo Jö.

¹¹Ne di apabihe Jö da zet'a ri müihu ngu ár nt'eni bi e hár nsunda. Njap'u gi tsethu gathu nö'ö gi thohu, ne gi pe'su ar ts'eti n'a ngu n'a.

¹²Ga njohyahu ga umfu njamödi Jö, ngetho bi 'raju ar seki ne ar ts'edi ga hñöñhu ya ñho ma da hyengagihu, nuju ne gathu nu ma'ra yá bötsi.

¹³Jö xi zimgagihu hár ts'edi ar 'bexui ndi 'buhu, ne bi thógagihu di 'buhupya hár ts'ut'wi ár hmöka T'u.

¹⁴Gehnu bi nö'ma ár ji bi zimgagihü har ts'oki, ne bi pumgagihü.

**Nunár ndöte ar tsi Hmu
Hesukristo bi jakagihü da
ñhogamüiwihü ar Dada**

¹⁵Ma tsi Hmuhü Hesu togo di hñöxa Jö hingi nheki, mi 'bu'ö nú'mü hinxki thoktho gatho nö'ö te japyä, ne xa töpa ár nsu gathoyü.

¹⁶Jö bi 'yent'wa hár 'ye bi hyoka gatho nö'ö te janü mañö mhets'i, gatho nö'ö te jawa har ximhai, gatho nö'ö nheki ne nö'ö hingi nheki, gatho nu'u ya ndö, nuya ts'ut'wi, nu'u ja yá ts'edi ne nu'u ja yá nsu. Gatho go bi hyok'ö nda nsundabi.

¹⁷Nú'mü hinxki thoktho gatho nö'ö teme japyä, mi 'bu'ö, ne gatho o hár 'ye'ö.

¹⁸Gehnu ár ñöxhmu ar nijö, togo ár ndüi gatho te ja, ne ar 'bet'o gatho nö'ö te 'bui. M'et'o bi mengi bi nte'ö xki du, ne njap'u gatho di 'bet'o'ö.

¹⁹Jö ar Dada go bi ne'ö nda hñömpa ár T'u gatho ár nsunda.

²⁰Ne nunár ndöte ár T'u'ö, bi japi bi ñhogamüiwi gatho nu'u 'buhnu mhets'i ne nu'u 'bukwa har ximhai. Ne nú'mü mi nö'ma ár ji ár T'u har pont'i, bi jakagihü da ntsixkwiü.

²¹Nu'ahü mam'et'o ngi 'buhü yap'u, hinge ngi mpöhwihü Jö. Ngí utsahü ha ri mfenihü, ngi othü nö'ö hingi ho. Ha nupya ár T'u'ö xi ja'ahü xka ñhogamüiwihü.

²²Bi njap'u nú'mü mi njö'i ne bi unga ár te har pont'i. Njap'u nda tsa nda 'bap'ahü xint'axi hár nthandi Jö, hinte ma ts'oki ngi pe'sü ne hinto nda k'as'ahü.

²³Jange mahyoni hingi hyehü ar ñ'emüi, ne xa gi zeta ri müihü gi to'mhü hyax'mü nunar ndo'mi xka 'yoxu har hoga mhö. Ne nunar mhönu xi mhömba gatho ár nxidi ar ximhai, ha nuga ar Pablo xi thuxkagi ga xani.

Ar Pablo pepa nu'u hingya xodyo

²⁴Xa di johya ngetho di tho ya thogi, di honga ri ñhohü. Ne njap'u 'yo di jwatwa yá ügi ma tsi Hmuhü Hesukristo, di homba ár ñho ar nijö n'ehe, gehnu ár ndo'yose.

²⁵Ne nuga bi thuxkagi ngu ár 'bego hár nijö. Jö xi 'raka nunar 'befinu honga ri ñhohü. Xi thuxkagi ga xi'ahü gatho ngu mönga hár mhö'ö.

²⁶Nunar mhönu xki t'ögi, honse mi pöse Jö. Bi njap'u gatho nuya jeyé bi thogi, ha nupya hö, xi utwa yá bötsi Jö.

²⁷Jö go bi ne njap'u, nda ut'ahü hingya xodyohü nö'ö hinxki fö mam'et'o: nunar tsi Hmu Hesukristo tsa da m'u ha ri müihü. Gehnu ar ndo'mi ma gi 'buhwihü hár nsunda.

²⁸Nuje yá 'begogihe Jö, habu gatho di mömfe ár thuhu, di höhe ar hoga mfödi. Di uthe ne di hu'mbabihe yá müi gatho ya jö'i, di hoñhe ga 'ba'mhe n'a ngu n'a hár nthandi Jö, di nxoge ngetho 'buhwi ar tsi Hmu Hesukristo.

²⁹Jange gehnu di umba ma müi di pefi, di hömpa ár ts'edi mpe ha ma müi.

2 Di ne gi pöhu, nuga xa di umba ma müi di apa Jö da max'ahü, da maxa nu'u ya me Laodisea ne gatho nu'u hinxta mpö'be.

²Di apa Jö da hup'a ri müihu gi pe'su n'adar mhöte. Ne da 'ra'ahu n'ar hoga mfeni gi pöhu nö'ö hinxki fötwahmö mam'et'o, tema mi benga Jö ma Dadahu ne ar tsi Hmu Hesukristo.

³Ngetho ha ma tsi Hmuhu Hesukristo, ka 'beshnu gatho ar hoga mfödi ne ar hoga mfeni.

⁴Di xi'ahu njap'u, hinto gi hofu da ka'ahu di honga ya nzatho ne.

⁵Mödi hindi 'buhwihu, wande di 'bup'u, ngetho hyax'mu di beñ'ahu. Di johya ngetho xta ode xa gi othu xiñho, ne döta ri ñ'emüihu gi pe'sfu ar tsi Hmu Hesukristo.

⁶Jange 'buhu xiñho ngu di 'ñepi da m'u nu'u yá meti ar tsi Hmu Hesukristo. Teñhu nö'ö bi t'ut'ahu nú'mu nga ñ'emüihu.

⁷Jahu ngu ya 'yuza foxa har hai, ngu n'ar ngu huxa har medo, dá ñöxa ri ñ'emüihu ngu xi t'ut'ahu, ne hingi tsayahu gi umfu njamödi Jö.

Di pe'su n'ar hoga te ngetho di 'buhwihu ar tsi Hmu Hesukristo

⁸Ntsuñhu, yo ma gi ñhehu togo da hya'ahu. Nu'u ya nemhñö jö'i 'yop'u xi'ahu nö'ö bense, ne ngu nö'ö xi mönga yá mijö'iwu tent'u, hinge ngu xi mönga ar tsi Hmu Hesukristo.

⁹Ngetho hár m'ui ma tsi Hmuhu Hesukristo, ka nhekip'u ár m'ui Jö.

¹⁰Ne nu'ahu xka nxogehu, ngetho gi n'at'wihu ar tsi Hmu Hesukristo, togo ár ñöxhmu gatho nu'u pe'sa ar ts'edi ne ar ts'ut'wi.

¹¹Nú'mu nga ehü ga tsuhu ar tsi Hmu Hesukristo, bi thök'ahu nö'ö mar nts'otho ha ri müihu, pontho bi nsek'ahu; hinge ngu ar nseni hoka

ya jö'i. Nunar nseninu bi 'ra'ahu ar tsi Hmu Hesukristo.

¹²Nunar xixthe xka hñöhu, pontho bi t'ak'ahu mahyegiwi ar tsi Hmu Hesukristo. Ne ga penju ga ntehu man'agi nú'mu ga ñ'emüihu ár ts'edi Jö, togo bi ko'spa ár te ar tsi Hmu.

¹³Mam'et'o xki hyo'ahu ar ts'oki, ne hinge ngi pe'su ar nseni thuxa har ndo'yo. Bi t'a'ahu ar te mahyegiwi ar tsi Hmu, ne njap'u bi pump'ahu ri ts'okihu.

¹⁴Bi nhwata nuya 'bepate mi hox'ahu ngar ts'oktehu, ne bi jöts'i bi fo'sa hár pont'i ar tsi Hmu Hesukristo.

¹⁵Ge'mu bi hñömba gatho yá ts'edi yá ñöxhmu ya ts'ondöhi, ne bi 'betwa ár tsa ha yá nthandi ya jö'i. Ka bi döhnü nú'mu mi ts'uta har pont'i.

¹⁶Jange hinto da deñ'ahu nu'mu hingi othu ngu yá nt'umbi'u, wa hingi tsifu yá ñhuni ne yá ts'ithe, hingi othwu ár dango ar 'ra'yo zönö ne ma'ra ya dango, wa hingi tsufu ya pa ntsaya.

¹⁷Ngetho gatho nu'u mi t'ot'a mam'et'o, ngu ár xuditho nö'ö togo ma nda e m'efa, ne nupya di pöhu gehnu ar tsi Hmu Hesukristo.

¹⁸Yo gi hofu togo da xi'ahu hinte ma nthöhö gi to'mhu ngetho hingi othu ngu ot'u. Nu'u ot'e xa ya hogajö'i, ne ndönga ya enxé. Hinte juk'u pepa nu'u hingi pödi, ne da 'ñexyá nsu tēnga nö'ö bense'u.

¹⁹Nu'u hingi mi'yewi ma tsi Hmuhu Hesukristo togo ár ñöxhmu ar nijö. Nunar nijö ngu n'ar ndo'yo hönga ár ñhuni ne njungwi ya ntot'i ne ya dexi, 'yo di te hömba ár ts'edi Jö.

²⁰Nu'mu majöni ga tuwihu mahyegi ar tsi Hmu Hesukristo, ne ga tsohup'u yá nt'umbi ya meximhai, yo'ö gi tembathohu yá mfeni ya jö'i 'mu, to da 'ñenö gi pepathohu ar ximhai.

²¹Jangu nu'u en'u: Yo gi xaxthu nuna, yo gi tsihu nö'ö, yo ma gi thañhu.

²²Gatho nuya nt'utiyu xi bense ya jö'i, nonga nö'ö te da thege xta 'yot'e, hinter me'u.

²³Nuya nt'utiyu xa majöni nheki xiñho, wande xi thoka ha n'ar döta mfödi ne hinxi thoki har ñ'lets'i. Ngetho ne da zönthmö ar ndo'yo, mödi hingi tsá da hñöka ya ts'omfeni ne ar ts'oki ha ma muihu.

3 Nu'mu majöni ga penju ga ntehu mahyegiwi ar tsi Hmu Hesukristo, hyoñhu m'et'o nuya ñho bi ja mañö mhets'i, habu bi huxa ar tsi Hmu hár ñ'ei ár Dada.

²Hñuxu ri mfenihu nuya ñho bi ja mhets'i, hinge nu'u jawa har ximhai.

³Ngetho xka tuwihu mahyegi ar tsi Hmu Hesukristo, ne ri tehu juta Jö, ngetho gi 'buhwihu ar tsi Hmu.

⁴Ne nú'mu xta penga man'agi, ma da thant'ahu mahyegiwi hár nsunda, ngetho gi n'at'wihu ri tehu.

**Nunar m'ui da hehup'u ne
nunar 'ra'yo di pe'supya**

⁵Jange hyehu gatho nuya ts'oki jawa har ximhai: yo gi tsimfu yá nthöti ma'ra, yo gi othu ya ts'oki xi nts'otho, yo gi othu nuya ts'oki ne ri ndo'yohu, hingi ñhehu da dö'ahu ar ts'omfeni. Yo xa gi möhu ar bojö, ngetho nu'mu gi jahup'u, pontho gi ndöñhu ar bojö, hingi ndöñhu Jö.

⁶Ngetho nuya ts'o'befiyu tsixa ya me'sku da zutwa ár kwe Jö.

⁷Nu'ahu maham'u ngi 'buhunu ha ya ts'o'befiyu n'ehe.

⁸Hinge honse'u, di xi'ahu gi hyehu gatho nu ma'ra ya ts'oki n'ehe, ngu ar nt'utsa, ar kwe, ar ts'om'ui, ar ts'ate ne ma'ra ya ts'one.

⁹Yo gi mpehu ar nhemhñö n'a ngu n'a, ngetho nö'ö ar m'et'o m'ui ngi pe'su maham'u, xka 'yeñhup'u ngu n'ar ze dutu.

¹⁰Ha nupya ngu n'ar 'ra'yo he, gi pe'su n'ar 'ra'yo te di hñöxa nö'ö togo bi hyoki. Hyax'mu di hogi da ñhehwi xiñho ár m'ui'ö.

¹¹Ne har 'ra'yo m'ui gi 'buhu, hindi nhekinu togo ar xodyo togo hingar xodyo, togo xi nsemba ár ndo'yo togo hin'ö, togo hinte pödi ne togo xa jár mfödi, togo m'ego ne togo hinte 'ñe ar hmu. Ngetho gatho gi ohu hár 'ye ar tsi Hmu Hesukristo, ne nö'ö mahyegitho 'buhwi gatho.

¹²Dá nheki ri 'ra'yo m'uihu ngu n'ar 'ra'yo he, ngetho Jö xi mö'ahu ne xi hwañ'ahu ngu ár meti'ö. Jange nupya 'buhu gi pe'su n'ar döta nhwëki, ne ar ñhogajö'i, hingi ñ'exu, pe'su n'ar hogamui ne ar ts'eti.

¹³Pe'sfu ar ts'eti n'a ngu n'a ri ñ'ohu, mpuñhu n'a ngu n'a, ha nu'mu n'ar ku xi tsot'a ri muihu, pumbabihu. Mahyegi ngu xi pump'ahu ar tsi Hmu Hesukristo, jahup'u n'ehe.

¹⁴Jange mahyoni da gop'atho'ihu ar mhöte. Njap'u gi n'athohu, ne da tsá gi 'buhu n'adar mfeni gi pe'su.

¹⁵Ar hogam'ui 'ra'ahu ar tsi Hmu Hesukristo da zis'a ri muihu,

ngetho xi zoñ'ahũ gi n'adar
ndo'yohũ gi 'bũhwihũ xiñho ma'ra
ya ku. Ne hyax'mũ umfũ njamödi
Jö.

¹⁶Di oda ri mfenihũ ár mhö ar tsi
Hmu Hesukristo. Ngetho xka hñöñhũ
ar hoga mfödi, ñ'uthũ ne hu'ma ri
mũihũ n'a ngu n'a. Ndöñhũ ar tsi
Dada gi tuthũ ya nsadi ne ya thuhu
nonga Jö. Umfũ njamödi ha ri mũihũ.

¹⁷Gatho nö'ö gi 'yothũ wa gi
möñhũ, 'yothũ gi nsundahũ ar tsi
Hmu Hesukristo, ne hár thuhu'ö
umfũ njamödi Jö ar Dada.

**Nö'ö mahyoni da 'yot'a ya gamfi ne
njap'u da gohwi xiñho nu ma'ra**

¹⁸Behñöhũ, 'yothũ ri dömeñũ ngu
di 'ñepi da 'yot'a nu'u xi jamfi ar tsi
Hmu.

¹⁹Ñ'ohohũ, möhũ ri 'behñöhũ, ne
yo gi othũ ndöta.

²⁰Bötsihũ, 'yothũ gatho nö'ö da
xi'ahũ ri dadahũ, ngetho ar tsi Hmu
go ne njap'u.

²¹Dadahũ, yo gi tsuhũ nts'edi ri
bötsihũ, xi'mũ da zot'a yá mui.

²²Begohũ, pefũ gatho nö'ö da
'bep'ahũ ri hmuhũ. Hinge hönse
nú'mũ hant'ahũ gi ne gi kohwihũ
xiñho. Pefũ xiñho di ponga ri
mũihũ, ngetho gi tsufu Jö.

²³Ne gatho nö'ö gi pehũ, umba ri
mũihũ gi 'yothũ, wande gi ot'wabihũ
ar tsi Hmu, hinge gi othwũ ya jö'i.

²⁴Gi pöñhũ, nunar tsi Hmu
Hesukristo go ma da 'ra'ahũ ar
nthöhö, ngetho gi pepabihũ'ö.

²⁵Ha nö'ö togo ot'a ar ts'om'ui, ar
tsi Dada ma da gut'wa ngu xi 'yot'e,
ngetho nö'ö hingi hwanta ya jö'i.

4 Hmuhũ, pe'sũ n'ar hogamũ
gi 'befũ ri 'begohũ. Beñhũ

gi 'ñehũ n'a ri Hmuhũ n'ehe bi 'bũ
mañö mhets'i.

²Umba ri mũihũ gi 'yafũ Jö, ne
hingi tsayahũ gi umfũ njamödi nö'ö
'ra'ahũ.

³Yapabihũ Jö da maxje da xoka ya
goxthi ga mömfe ár mhö, ne ma'ra
da bö nö'ö himi fötwa mam'et'o ar
tsi Hmu Hesukristo. Ngetho di pe
nunar 'befĩnũ, jange xi joka har fadi.

⁴Yafũ Jö da tsã ga mönga xiñho
nö'ö mahyoni ga mö.

⁵Jamasuhũ hanja gi 'yohũ. 'Yohũ
gi pe'sũ n'ar döta mfödi ha yá
nthandi nu'u hingya gamfi. Yo gi
tsayahũ mömfũ ár mhö Jö.

⁶Nú'mũ gi ñöhũ, möñhũ ya hoga
mhö ne di 'benga nt'ek'ei. Beñhũ
xiñho nö'ö ma gi thöthũ togo gi
ñöwihũ.

Ya ngöxanzengwa

⁷Nuna ma hmöka ku Tikiko,
gehnũ n'ár hoga 'bego Jö xta mpehe
mahyegi. Nu xta zomp'unũ, da
xi'ahũ hanja di 'bukwa.

⁸Jange di peñ'a'ihũp'u da xi'ahũ
tema di thohe, ne da hñup'a ri
mũihũ.

⁹Xi mewi n'ehe ma tsi hmöka
hoga ku Onesimo, ngu gi pöñhũ ar
mengup'u. Xta zomp'uyũ ma da
xi'ahũ gatho nö'ö di thokwa.

¹⁰Peñ'a'ihũ nzengwa ar ku
Aristarko di o'bewa har fadi.
Zengwa'ihũ ar ku Mörko ár mēni
ar ku Berhnabe. Gehnũ xi nsi'ahũ;
nú'mũ xta zomp'u, nuñhũ xiñho.

¹¹Peñ'a'ihũ nzengwa ar ku Hesu
t'embabi ar Hogajö'i. Gatho ya
xodyo xi jamfi, hönseyũ xi maxkagi
xta mömfe ár hoga ts'ut'wi Jö, ne
njap'u xi hubga ma mui.

¹²Zəngwa'ihu ar ku Epafra n'ár 'bego ar tsi Hmu Hesukristo. Gehnu n'ar mengup'u n'ehe. Hyax'mu umba ár mui apa Jö da zət'a ri jamfihu, gi 'buhu xiñho, ne hinte da 'bedi gi 'yothu gatho nö'ö ne Jö.

¹³Nuga di damajöni 'butho da du homp'a ri ñhohu. Hinge honse'ihu, benga ya ku me Laodisea ne ya me Yerapolis n'ehe.

¹⁴Pəñ'a'ihu nzəngwa ar hmöka ku Luka togo ar unga ñ'ethi, ne ar ku Dema.

¹⁵Zəngwagihup'u ya ku 'buhnu Laodisea, ne ar ku Nimfa ne gatho ya ku mhunsa hár ngu.

¹⁶Nú'mu xki jawahu gi nehü nunar he'minu, thokwabihu ar nijö 'buhnu Laodisea, ne nunár he'mi'u 'yafu gi nehü.

¹⁷Ñembabihu ar ku Arkipo: Jwata xiñho nunar 'befi xi 'ra'a ar tsi Hmu.

¹⁸Nuga dar Pablo, xta ja ma 'ye xta ot'ase nunar nzəngwanu. Yo ma gi pumhnihu di owa har fadi. Jö da hwëk'ahu yá ñho. Dá njap'u.